

DBKL digesa selenggara longkang, perparitan

Kuala Lumpur: Dewan Bandaraya Kuala Lumpur (DBKL) digesa segera menyelesaikan masalah penyelenggaraan longkang bagi mengelak banjir kilat di pusat bandar terus berulang.

Ia berikutan keadaan longkang di kawasan pusat bandar didakwa dalam keadaan tidak memuaskan, khususnya berhampiran tapak pembinaan.

Pengerusi Ikatan Komuniti Selamat, Tan Sri Lee Lam Thye, berkata situasi itu menyebabkan aliran air hujan di longkang sekitar pusat bandar gagal dioptimumkan, sekali gus meningkatkan risiko kejadian banjir kilat.

Beliau yang juga bekas Ahli Lembaga DBKL berkata, sistem perparitan dan saliran perlu dinaik taraf berikutan pertambahan projek mega di sekitar Kuala Lumpur.

"Banyak longkang tersumbat dengan sampah, hakisan tanah dan sisa buangan dari tapak binaan sekitar ibu negara. Masalah ini sangat serius dan perlu mendapat perhatian segera pihak berkuasa, khususnya DBKL.



Lee Lam Thye

"Pada musim monsun ini kita boleh jangka hujan akan turun dengan lebih banyak dan menyebabkan orang ramai akan sentiasa berdepan risiko banjir kilat jika masalah ini tidak diatasi segera," katanya kepada BH, semalam.

Kelmarin, BH melaporkan, penilaian awal Jabatan Pengairan dan Saliran (JPS) mendapati hadapan tapak binaan dan hujan lebat berterusan sehingga tidak mampu ditampung takungan sedia ada, menjadi punca banjir kilat di Lembah Klang, Khamis lalu.